

四庫全書

史部

欽定四庫全書

史部

欽定八旗通志卷

一百五十四至
一百五十五

欽定四庫全書

欽定八旗通志卷一百五十四

人物志三十四

大臣傳二十

滿洲正黃旗八
兆惠

開泰

阿思哈

開泰

開泰滿洲正黃旗人姓吳雅雍正二年進士改庶

吉士五年授編修充陝西鄉試副考官九年九月

充

日講起居注官十一月遷侍講十一年因侍班錯誤
敕黜退翰林在

乾清門行走十三年仍授編修乾隆元年遷國子監
司業充江西鄉試副考官二年提督湖北學政四
年調安徽學政八年正月遷祭酒二月稽查右翼
覺羅學旋提督江蘇學政三月擢內閣學士六月
授兵部右侍郎仍留學政任十一年七月充

經筵講官十一月授湖北巡撫十二年七月疏言社

倉較常平尤近於民弊亦易滋湖北社倉穀麥五十二萬餘石散在村莊恐多虧缺委員徧查又滋擾累應飭道府按季巡查所至就便抽驗如有侵那責社長勒追將失察州縣揭報庶不至有名無實得

旨嘉獎十月調江西巡撫十三年調湖南巡撫十四年三月疏言臣按部咨各省常平倉穀以雍正年間舊額為準湖南溢額穀五十五萬餘石令糶價提

貯司庫臣查雍正年間舊額貯七十餘萬石湖南
素稱產米年穀順成照舊額原不慮匱乏而綢繆
未雨先事應圖查乾隆三年撥運福建四年撥運
江蘇二年至八年各省赴湖南採買通計一百七
十五萬有奇若將溢額穀盡糶遇本省需用及隣
省糶撥必至倉穀缺額買補非易

諭曰可謂留心積貯湖南既屬產米之鄉則多貯以資
隣省實為有益也但不必更加於此則得矣十五年

九月有壽掄元者詐稱河南候補同知赴永州採
買河工木植布政使孫灝諭永州府協同照料尋
得其假冒狀開泰以孫灝未奉公文遽發諭帖殊
為未諳具奏

諭曰壽掄元情詞閃爍又無本地咨文其為游棍誑騙
無疑孫灝不即行拿究乃混給諭帖令地方官照料
及其形跡漸露始行訪拿明係孫灝初顧情面後恐
牽涉方行查究就此情節開泰理應指叅乃但稱未

諳故為寬其詞說孫灝係開泰門生其曲徇私情巧為庇護不問可知此等伎倆焉能逃朕洞鑒開泰孫灝俱交部嚴加議處以為師生黨比者戒議上

詔革職留任十二月調貴州巡撫十八年六月疏言古州新疆歸化設屯募軍按戶分授上田六畝或中田八畝下田十畝當按屯之初原足供一家口食今食指日多將來戶口愈增既無田可加又別無安置之處生計愈難查新疆營汛額兵較廣向例

屯戶不准入營然以額設營糧養屯戶事屬兩得
嗣後願食營糧者一體挑兵屯軍缺卽於本屯及
別屯子弟內揀補其革退屯軍皆逐回原籍免致
窮迫滋事得

旨獎其辦理得宜九月授湖廣總督十九年四月加太
子少傅二十年六月調四川總督二十二年五月
疏言夔州府屬石碛司東接楚省南北及西與忠
州之彭水萬鄧等縣犬牙相錯廣數百里請移夔

州同知駐石砭經理錢糧詞訟並移駐萬縣市郭
里巡檢以資差遣得

旨允行二十三年四月金川與革布什咱構釁圍其吉
地官寨開泰同提督岳鍾璜檄遊擊楊青都司夏
尚德等分駐章谷泰寧相機排解令鄂克什雜谷
土司援革布什咱綽斯甲布以攻金川金川退至
丹東遁去旋復圍攻丹東吉地革布什咱土司色
楞敦多布奔泰寧求援開泰復檄各土司出兵助

之調雜谷土練千以五百同梭磨土兵駐丹壩五
百同明正木坪各土兵駐章谷泰寧調黎雅戎邊
營兵二百赴打箭爐彈壓令金川酋郎卡撤兵

諭曰向來番苗自相攻擊原可不必繩以內地官法此
次金川與革布什咱興兵拏怨原不過因結親起釁
情形本與蠻觸無殊惟所奏分撥土練彈壓打箭爐
等處一節未甚明晰該地係通藏之道如止巢穴中
自相劫掠於打箭爐有何干涉但開泰岳鍾璜素非

好事之人其所陳奏慮其偏於息事斷不至過於張
皇果使該酋之意不在革布什咱將為邊圉滋擾伊
等別有訪聞踪跡必須徹底辦理據實速奏候朕另
行降旨五月疏報章谷土十戶巴旺土司會革布什
咱敗金川及附金川之布拉克底土舍兵金川酋
焚所佔吉地官寨而遁全復革布什咱地留綽斯
甲布明正土司兵分駐之送色楞敦多布歸寨

諭曰金川所據革布什咱官寨既經明正綽斯甲布等

土司全行奪回可見番民挾仇攻擊之事原所應有
殊不必以內地官法繩之該處文武果能曉諭約束
可以寧輯固屬甚善不則惟有以番攻番之一策惟
湏靜鎮以處之耳七月加太子太保二十四年十月
以松潘鎮總兵楊朝棟年近七十難勝任現赴京
陛見其優劣自在
洞鑒與岳鍾璜合疏以

聞

論曰此奏深為有意取巧督提職司節制各鎮松潘尤近邊要缺該總兵平日果否勝任早應留心體察據實奏聞方見實心整頓乃於該總兵赴京前亟先為此奏明係從前瞻徇姑容今當陞見在即衰庸之態難逃朕鑒故為合詞入告計圖卸責此等伎倆即朕臨御之初亦不易輕售况欲嘗試於閱事二十餘年之後耶開泰等在督提中尚屬可任之人何以竟為此奏殊不可解著交部嚴加議處部議革職

詔從寬留任二十六年四月奏報金川酋退還侵占丹
壩土司地九土司亦撤兵二十七年二月奏土司
承襲例取隣封土司甘結金川酋莎羅奔死姪郎
卡應襲素與隣封革布什咱綽斯甲布小金川不
和無庸取結

諭曰開泰等奏金川襲封土司無庸取具隣封土司甘
結意在直捷簡便所見亦是然不為郎卡等明白宣
諭恐郎卡不知懷畏轉疑開泰等有意遷就一似徇

其所請竟不待各處甘結者然或致潛生驕縱殊非
控馭之道開泰岳鍾璜即曉諭卽卡等謂近隣土司
與爾素有嫌隙若因承襲之事照例取結伊等定不
樂從今據爾懇求竟免其輾轉取結以示嘉惠之意
但襲職後或忘恩滋事在隣近諸部斷不能相安而
封疆大臣亦斷不肯為此稍貸方足令其儆惕於體
制亦為協允十一月奏金川佔據丹壩土司瑪讓地
方綽斯甲布土兵往援金川退據山梁已嚴行詰

責郎卡復令守備溫欽等馳往查辦

諭曰開泰等奏郎卡滋擾丹壩現飭守備溫欽等詰責查辦一摺未免先事預設調停之見於辦理機宜未能領會該督等前於乾隆二十三年奏金川與革布什咱有結親構釁之事明正綽斯甲布兩路進攻屢經傳諭不必懲以官法惟有以蠻攻蠻之一策或令綽斯甲布小金川分據其地而彼時開泰岳鍾璜不能體悉朕旨未免意存姑息但取解紛了事以致養

成驕縱此時郎卡初為土司即已垂涎丹壩其明驗也殊不知此等狼子野心即使目前詰責認罪又安能保其永遠受約安靜乎土司內如革布什咱丹壩等類其力之強弱雖殊然皆可借此以為郎卡之敵如果因其挾仇攻擊竟將郎卡勦滅豈非策之最善者著傳諭開泰等斷不可有先事部署官兵協力扶助之計致涉張皇所有隣近土兵既集或即協力勦除分有其地正可聽其各自為計番境轉可相安倘

各土司不能併力勦除而郎卡仍怙惡不悛有必須
另行辦理者則亦非該督提等以川省綠營官兵所
能任其事開泰等臨時據實奏聞候朕酌辦此時只
須靜以聽之不可調派紛紜徒擾番人觀聽也二十
八年六月奏言九土司同時並舉綽斯甲布小金
川兵分三路進攻丹壩梭磨卓克采從噶克兵擊
敗金川奪取凱立葉山梁石卡革布什咱兵攻取
洛爾察地方巴旺土兵殺布拉克底哨探兵臣鼓

勵各土兵互為聲援伺隙攻取

諭曰開泰等奏九土司攻打金川所辦尚未得窺要開泰向於郎卡遣人赴省時每許進見常加慰撫而隱縱綽斯甲布等攻擊在郎卡素性狡黠此等行為豈能掩其耳目甚非天朝開示誠信駕馭番夷之道郎卡既於綽斯甲布等屢肆欺凌衆土司合力報復原不為過督臣既聞其事惟應明白宣示綽斯甲布等以郎卡既得罪於衆土司爾等悉銳往攻倘能勦滅

其巢亦免爾等後患但不必官為援應而於郎卡來人嚴為拒絕且切諭以爾既結怨隣境誰肯甘心為爾蠶食必將睽集各寨奮力復仇此亦爾所自取我等斷不肯曲為庇護如此則郎卡既不敢恃以逞強而綽斯甲布等亦可洩其積忿於事理方為兩得乃開泰既用謫以籠絡郎卡復隱為援助各土司殊失控制大體尋得

旨開泰庸懦無能種種謬誤深負簡任著革職賞給頭

等侍衛前往伊犁辦事十月卒

阿思哈

阿思哈滿洲正黃旗人姓薩克達雍正四年由官
學生考授內閣中書遷侍讀淳陞刑部郎中軍機
處行走乾隆十年三月擢甘肅布政使十四年四
月授江西巡撫十五年三月疏言各營演放連環
鎗礮止用火藥須將鉛子裝放演練庶免臨時倉
卒馬原備騎兵衝突各營恐兵偷減料草多委員

朋喂惟合搯日令馬兵騎射一二次應令自喂俾
人馬相習至技藝惟當純熟得用步法架勢不必
朝更夕改

上嘉其所言得要九月調山西巡撫十六年五月疏報
平陽府災未親往撫卹

詔責之十七年十月疏報蒲解等屬被旱偏災平陽紳
耆捐銀解河東道庫為加賑之用

諭曰此奏殊屬卑鄙錯謬之至朕實駭聞直省偶遇偏

災地方殷實之家樂善好施或自出家廩積貯或出
已資糴運米石散給貧民功令原所不禁惟具數報
官量加優敘以為閭閻任恤者勸耳並非歛貲貯庫
藉以助賑也國家賑濟蠲緩重者數百萬兩少亦數
十萬兩悉動庫帑正項從無顧惜地方富戶所捐幾
何貯庫助賑殊非體制此端一開則偏災之地貧民
既苦艱食富戶又令出資國家撫卹災黎何忍出此
深負朕痼瘼一體之意阿思哈著交部嚴加議處所

捐銀兩著發還聽該紳衿等自行辦理復

諭曰阿思哈不勝巡撫之任著來京候旨尋部議革職

十二月授吏部員外郎二十年三月

命以布政使銜往軍營辦理糧運四月授內閣學士七

月議敘軍功加一級二十二年六月署江西巡撫

先是江西軍丁自歸州縣編查殷實者多脫漏貧

者將屯田典賣漕運幾至貽悞阿思哈蒞任即設

法清釐以舊冊詳核各丁族譜及保甲戶冊脫漏

之丁及新生之丁登記無遺至二十五年奏查出
軍丁二十七萬五千九百六十三其典賣屯田照
直省分年減價回贖旗地例查契核定銀數令原
丁措贖無力則責成現運之丁及同族同船共贖
回三百一十頃又查出隱漏屯地九百二十五頃
查設屯原以贍運而軍丁散居屯地皆招佃收租
所入無多每船十年大造需費千兩每年運費數
百兩皆散軍戶族津貼屯田有名無實臣酌將各

船原有熟屯及贖回查出各田酌增餘租十一萬
七十七百餘兩連原額租銀一萬二千八百八十
七兩共十三萬六百有奇江西十四幫存漕船六
百三十八隻除九江吉安建昌贛州等衛原有分
貼費銀其餘均酌給餘租銀以為造船起運之費
並將贛衛餘租過多者撥濟撫饒等過少之衛四
年委官編查一次軍丁無虞脫漏漕運藉裕轉輸
疏入報

聞七月實授江西巡撫十一月江西學政謝溶生劾阿
思哈婪賄派累

命尚書劉統勲侍郎常鈞會同兩江總督尹繼善往審
尋鞠實擬絞二十六年

詔免罪給三品頂帶往烏嚕木齊効力贖罪二十八年
命往伊犁協同明瑞辦事六月授廣東巡撫十一月調
河南巡撫二十九年十月疏言河陰縣地僻事簡
賦少民淳緊接滎澤請將知縣典史裁汰歸併滎

澤縣管理原設外委一馬兵一守兵十二應酌留
外委一守兵五餘徹歸原營增設巡檢一以資彈
壓其原設教諭一應改為河陰鄉學下部議行三
十年三月疏言綠營由步兵挑馬兵游拔外委把
總步兵內有弓箭鳥鎗簾牌礮手等項向例馬兵
缺出止于弓箭步兵內拔補而鳥鎗兵不預是以
兵皆習弓箭鳥鎗兵多庸陋請撥各標營馬兵缺
出十分之二為馬鎗缺如步鎗純熟兼能馬鎗者

准拔補馬兵兼令學射如馬上鎗射合式即與弓
箭馬兵一體考補外委把總則上進有階各思努
力從之九月疏言衛河運道在在淺阻濬縣三官
廟老鸛嘴等處砂礮挺據河心重船尤易踈虞向
於衛河上下築草壩二十八以束水勢前撫臣胡
寶琮奏請疏挖並於淺處建草壩臣查衛河發源
輝縣百泉南至新鄉縣之岔河尖與丹水合又百
五十里經衛輝城北為兌漕水又東北至濬縣會

淇水入湯陰內黃界受湯河洹河之水至直隸大名縣境入臨清河夏秋水盛無須草壩冬令源澁草壩亦屬無益不若於上游先期蓄水臨時開放得宜舊以河水兼濟民田有官渠民渠之別夫民田需水多在春夏漕船起運則在秋冬農工已竣民田不須灌溉正可濟運現飭府縣督河員於九月望後起至漕船出境止暫閉衛河以上民渠支港使水歸官渠並將官渠下游閉閘蓄水重運自

可流通原建草壩之處應停止鑿去三官廟老鸛
嘴等處砂礮其餘浮沙飭汛員集夫挑挖用刮板
隨船疏濬使沙隨水蕩以利漕運十二月疏言河
工料物向時沿河州縣皆領帑按畝派買民多苦
累臣酌借司庫閒款銀官為試辦代買代交於七
八月間委員赴產料地方照應辦數目各依時價
預給現銀約至十月各工開廠委佐雜監同交兌
丞倅督察河員隨到隨收不敢稍有浮重惟運脚

等項及新料虛鬆應扣折耗計每稽料一觔糧戶
應貼運費錢一文較之往年不及十分之一不數
日間貼費盡完解司歸款料物比民辦早完月餘
疏入均報

開三十一年疏言辦理地方公事例取印結甘結稍不
如式即干駁換府縣多用空白赴上司衙門照寫
每借端需索查鄉地隣佑等類及在官之人本身
甘結同鄉官印結原因其人別無可據必須取結

為憑至各衙門事件俱憑印文核辦結內不過摘
取印文數言未增所結是實一語豈印文不足憑
轉以印結為可信至具題事既見之奏疏又須加
結送部體制亦覺未符請嗣後一切甘結及同鄉
同官印結例不用文者仍舊取結其具題事件及
詳咨文移于印文外加結者悉停止事歸易便下
部議行三十二年六月疏劾紀縣知縣蔡淮英因
辦兵差借端累民

上以阿思哈並不瞻徇下部議叙加一級七月審題恭
淮英擬杖傳

旨申飭改擬絞候三十四年六月授雲貴總督八月因
河南巡撫任內辦騾解滇於定額外多六百餘頭
飭交部優敘加二級九月阿思哈出銅壁關至蠻暮軍
營具奏軍糧馬匹不敷情形

諭曰前用阿思哈為雲貴總督以其曾在北路軍營辦
事諸務尚能諳習乃伊甫至騰越即奏該處辦糧情

形已存畏難之見及至蠻暮所奏糧馬事宜專欲仰
給內地竟不知就所到之處實力籌辦一味取巧預
占地步不復具有天良深負朕委任之意阿思哈著
革去總督給副都統職銜在領隊大臣上行走以觀
後效十二月授吏部侍郎三十五年二月回京

諭曰阿思哈來京召見奏對時仍申其糧馬難于措辦
之說及詰以彰寶到滇後何以購備轉得充裕而前
任總督竟至束手無策阿思哈始無辭以對至詰以

革職後如何効力之處據稱同諸大臣督率官兵攻戰其言更荒唐可笑阿思哈既革職留營即與兵丁無異況以曾受國恩之大員獲罪急圖自効理應衝鋒殺賊奮不顧身乃猶覲顏附於大臣之列不肯親冒矢石以巧遂其巽懦偷安之計是誠何心其漸染積習甘於委靡無用全無滿洲勇往誠樸之氣又安望其改悔振作乎即此一節其心更不可問而其罪更不可逭仍著革職發往伊犁自備資斧効力贖罪

三十九年五月

諭在軍機章京上行走七月授左都御史九月大學士

舒赫德勦山東壽張逆賊王倫

命偕額駙拉旺多爾濟率健銳火器營兵千協勦事平
下部議敘尋以拉旺多爾濟赴城北塔灣搜勦逸

賊阿思哈未經同往

勅部嚴察議奏部議革職

詔從寬留任十一月

命在紫禁城內騎馬四十一年正月署吏部尚書旋署
漕運總督四月實授十月卒

諭曰阿思哈老成勤謹宣力有年擢任漕督方資倚畀
茲聞溘逝深為軫惻所有歷任降革之案俱著加恩
開復應得卹典該部察例具奏

賜祭葬如例謚莊恪

兆惠

兆惠滿洲正黃旗人姓吳雅父佛標官至都統雍

正九年兆惠由筆帖式在軍機處行走補內閣中書十三年遷內閣侍讀乾隆二年遷兵部郎中四年遷內閣侍讀學士六年擢內閣學士七年遷

盛京刑部侍郎兼攝兵部事九年調補刑部右侍郎十年授正黃旗滿洲副都統十一年授鑲紅旗護軍統領十三年五月因定擬誤繙清文一案罪名過輕部議革職得

旨從寬留任六月兼管戶部侍郎事八月派赴金川軍

營督辦糧運十二月奏言卡撒左右山梁色爾力
等路貯糧僅供兩月現調兵前來迅速臣等附近
之崇德牛廠及美諾糧二萬餘運往籌備臣觀軍
營諸將惟護軍統領烏爾登總兵哈攀龍勇往副
將以下頗多庸病之員又聞各省派兵時將備間
以家丁冒名糧或佔額兵役使統俟經畧抵營告
令酌辦

諭曰俱屬公論可告之經畧大學士傳恒以備採擇又

奏奸棍買餘米射利

詔嚴察毋滋弊十四年大軍凱旋奉

旨留核軍需錢糧十五年正月授正黃旗護軍統領嚮

導統領十一月調戶部左侍郎十六年八月

命赴山東勘傳抄尚書孫嘉淦偽稿一案暫署巡撫事

九月還京十七年充

經筵講官十八年二月

命赴西藏辦事防準噶爾四月奏言駐藏五百兵同時

換班不便請分為二起一于頭年五月起程七月
抵藏一于次年二月起程四月抵藏得

旨允行十九年議勦準噶爾

命兆惠協理北路軍務並總理糧餉二十年二月請同
哨探兵進勦

諭留烏里雅蘇臺辦事在領隊大臣上行走三月準噶
爾台吉噶爾藏多爾濟降

諭兆惠以牲畜給之十月總理北路台站十一月調赴

西路巴里坤辦事兼理額林哈畢爾噶台站定邊
右副將軍薩喇爾自伊犁被陷復歸二十一年正
月兆惠聞其至吐魯番約與進勦奏入

諭曰兆惠辦理甚合機宜昨曾降旨令管特訥格爾台
站今著傳諭伊到特訥格爾若事繁即留辦事如易
料理即同達爾黨阿領兵進勦在叅贊大臣上行走
其巴里坤一應事務著和起照兆惠所定章程悉心
經理三月大軍再定伊犁

上以定西將軍策楞辦事未協

諭兆惠駐伊犁五月授定邊右副將軍六月

命籌伊犁善後事宜七月請定吐魯番界編回人莽阿
里克所屬佐領

允之先是侍衛托倫泰赴葉爾羌喀什噶爾撫諭大和
卓木布拉呢敦小和卓木霍集占久未返兆惠奏
遣副都統阿敏道以索倫兵百及厄魯特兵三千
收服阿克蘇庫車烏什各回人且偵托倫泰信是

月霍集占送托倫泰還兆惠飭阿敏道馳往撫又
奏言定西將軍達爾黨阿進兵哈薩克索阿睦爾
撒納台站馬多為嗎哈沁所竊臣現遣兵搜捕並
知會達爾黨阿於撤兵還時沿途緝之得

旨嘉獎十月奏偵霍集占有背逆狀密飭阿敏道速進
兵報

聞是年冬達爾黨阿自哈薩克撤兵還厄魯特宰桑之
從征者謀煽亂未發噶爾歲多爾濟詭以叛賊巴

雅爾掠人畜告兆惠遣將軍和起調諸厄魯特兵
協勦而噶爾藏多爾濟之姪扎那噶爾布及宰桑
呢瑪哈薩克錫喇達什策凌回人莽阿里克等陰
通巴雅爾中途肆逆和起被害兆惠以孤軍遠駐
伊犁聞信整師東旋擊賊自濟爾哈朗移兵甫至
鄂壘扎拉圖突遇達什策凌等乘夜奮擊殺賊千
餘噶爾藏多爾濟及扎那噶爾布等糾衆邀歸路
連戰不退遂被圍二十二年正月巴里坤辦事大

臣雅爾哈善馳以

聞

詔趣侍衛圖倫楚以兵八百馳援二月雅爾哈善續遣索倫兵往迎

諭曰兆惠係駐扎伊犁等處辦事大臣適遇厄魯特等背叛奮勇勦賊甚屬可嘉著封為一等伯世襲罔替並將御用荷包玉韞鼻烟壺加恩賞賜尋授領侍衛內大臣戶部尚書兼鑲白旗漢軍都統是月兆惠

還抵巴里坤疏陳自上年十一月由濟爾哈朗至
本年正月三十日至特訥格爾沿途勦賊鏖戰狀
諭曰前因副將軍兆惠領兵勦賊全師而出遣人調取
援兵於雅爾哈善奏到時曾降恩旨今覽所奏沿途
與賊交戰甚為勞苦兆惠等所領並非進勦之兵且
馬匹無多官兵等竟能同心奮勇遇賊盡行勦滅振
旅而回實堪嘉予此次奮勉行走暨陣亡受傷官兵
查明分別賞卹圖倫楚所領兵曾經出力者一併交

部議敘兆惠尋奏偵巴雅爾及扎哈沁等潛牧木壘
以兵往捕

上嘉兆惠等遠道甫歸奮勇不怠

賜御用玉韉荷包鼻烟壺會巴雅爾遠遁乃還

詔同定邊將軍成衮扎布分路翦滅厄魯特賊衆三月

偕叅贊大臣鄂實等由額林哈畢爾噶路進勦時

扎那噶爾布已殺噶爾藏多爾濟尋又為台吉達

瓦所殺而獻其首於軍門適阿睦爾撒納自哈薩

克盜馬竄歸伊犁掠扎那噶爾布牧兆惠檄叅贊
大臣富德往追而自駐濟爾哈朗弗與俱

上訓飭之五月

諭曰成衮扎布兆惠奏綽和爾得木齊阿穆呼朗等投
赴軍營暫行安撫所辦尚合機宜惟伊等並不以擒
阿睦爾撒納為要務而亟以辦理回部為言殊屬不
知緩急務迅速辦理毋負委任六月奏擒獲阿睦爾
撒納之姪達什策凌及宰桑烏巴什並遵

旨策應富德報

聞七月奏擒獲巴雅爾于塔爾巴噶台及其孃哈薩克
汗阿布賚畏威歸順表獻馬下部知之八月奏言
遣圖倫楚擊敗哈薩克錫喇賊衆于阿爾噶凌圖
侍衛愛隆阿擊前掠臺站之都爾伯特台吉納木
奇降其衆報

聞是時阿睦爾撒納竄入俄羅斯而遣往撫諭回城之
副都統阿敏道為逆回霍集占所戕九月

命兆惠等籌勦回部尋奏請於烏魯木齊屯田且便與
哈薩克市馬

詔如所請行十二月成袞扎布改北路左副將軍

詔授兆惠為定邊將軍二十三年正月奏言沙喇擘勒
厄魯特賊衆萬戶請先勦除再赴葉爾羌喀什噶
爾

上察其有畏難之意以叅贊大臣雅爾哈善為靖逆將
軍專辦回部

諭軍機大臣曰辦理沙喇鄂勒賊衆已派兵五千自屬裕如兆惠等宜加意擒勦不留遺孽若仍不能集事惟兆惠是問又

諭曰厄魯特性習反覆無定往往自相戕害從前達瓦齊在伊犁時人心尚且離散今豈有堪為統率之人哈薩克錫喇等小醜焉能使賊衆服從且衆厄魯特已成嗎哈沁竄伏一處必互相爭奪大兵乘其潰亂迅往襲擊立可奏功兆惠等勿因其烏合之勢過為

疑慮即遵旨相機辦理二月奏言臣節奉

訓旨敢不益加奮勉口糧現未全到擬即進兵

諭巴里坤辦事大臣速運三月奏言臣等前慮賊衆會

合以抗我兵我

皇上先幾洞鑒謂烏合之衆不能久聚萬里之外誠如

目覩臣與副將軍策布登扎布等分勦策布登扎

布以兵千二百趨博羅塔拉及賽里木淖爾臣與

巴祿等亦以兵千二百趨博羅布爾噶蘇副都統

瑚爾起等趨尼勒喀侍衛達禮善等趨齊格特衣
布拉克約期俱會伊犁並行文北路堵截尋又奏
賊衆紛紛潰逃狀報

聞伊犁附近有庫隴癸山叛黨恩克圖塔爾巴布圖庫
特克爾得克四宰桑據險藏匿兆惠偵知之遣侍
衛扎延保投誠厄魯特達什車凌收其牧羣而自
以八十餘騎夜入山口勦之時曉霧迷漫布圖庫
特克爾得克脫走餘悉就斬獲捷

間

上嘉獎交部議敘四月奏報叛賊琿齊鄂哲特等就擒賊牧俱殘破準噶爾之事將竣請由伊犁進勦回

部

上以哈薩克錫喇等未獲

訓諭之五月奏言臣於四月十三日渡伊犁河抵格根喀爾奇喇詢嚮導云由特穆爾圖淖爾踰巴爾琿嶺假道布魯特一月可至葉爾羌喀什噶爾

諭曰前屢降諭旨令兆惠將伊犁等處叛賊渠魁全行擒獲再往回部今來奏業已過行自毋庸復返但當沿途休息馬力與雅爾哈善會合並即招降布魯特人衆兆惠尋奏布魯特頭目圖魯啟拜鄂庫等赴軍乞降臣等譯讀

敕書即行收服七月遣侍衛達桑阿烏爾登托倫泰先後護布魯特東西二部使者入

覲

命速赴回部與雅爾哈善合兵進勦會雅爾哈善圍庫
車霍集占自糾衆來援為我軍擊敗冒死入城復
脫走雅爾哈善坐踈縱革將軍職

詔趣兆惠馳往代將其軍九月

諭曰據兆惠奏遵前旨領兵八百名速赴回部一抵庫
車即與雅爾哈善協心勦賊斷不肯半道而回有靦
顏面所奏肫誠勇往深得領兵大臣之體軍旅為國
家重務以滿洲大臣身膺簡畀統率戎行正當踴躍

自効公爾忘私我朝簡策所垂忠勤代著遠軼前古
乃近來漸染惡習臨事心懷觀望或聞撤兵慶若更
生曾不知奉公體國之義謂何此風深可痛恨今兆
惠毅然以勦賊自任其器識實出諸臣之右且計其
具奏時尚未知有雅爾哈善失機債事不堪任用今
伊往代之旨乃如此陳奏深為嘉悅著加恩賞戴雙
眼花翎兆惠尋奏言臣抵阿克蘇降回衆五十餘
戶烏什伯克霍集斯及其子漠咱帕爾亦攜衆獻

城降臣遵

旨令舒赫德以侍衛銜駐阿克蘇臣即率大軍赴葉爾
羌疏入

獎賜荷包鼻烟壺兆惠既至葉爾羌奏我兵三千餘行
戈壁千五百里馬力疲急需接濟馬三千而先是
上念我軍長途跋涉

特派索倫察哈爾健銳營及陝甘綠旗兵繼進並傳
諭副都統阿里衮侍郎永貴於巴里坤豫選馬二千送

庫車備調至是阿里袞接兆惠咨請親送軍前
允之

諭富德率大軍策應兆惠永貴巡查臺站亦赴阿克蘇
十一月舒赫德馳奏兆惠於黑水被圍

敕富德阿里袞及舒赫德等速往援舒赫德奏言兆惠
遣索倫侍衛五十保等兩突圍齎送奏稿內稱臣
等於十月初六日直薄葉爾羌城賊緣邊畫溝立
隊自固我師以少擊衆所向披靡三戰斬殺甚夥

賊擁竄入城不出臣遣愛隆阿堵截喀什噶爾援
賊並迎將軍納穆扎爾叅贊大臣三泰軍謀賊輜
重在城南英莪奇盤山計乘虛襲之十三日取道
城東渡黑水未及半而橋圯我師渡河者纔四百
騎霍集占悉醜類二萬餘來戰而地皆沮洳人馬
不能如志且戰且踰河退保大營然我師人知効
命殺賊十餘營中現餘兩月糧深濠高壘以待援
師輕敵妄進之罪在臣兆惠一人實難逭疏入

諭曰辦理回部一事原因賊酋霍集占等向為厄魯特
拘囚阿巴噶斯之地自大兵平定伊犁出諸陷穽之
中俾仍長其舊部何啻起死肉骨而狼子野心不知
感戴生成輒敢負恩反噬甚至戕害將軍所遣之副
都統阿敏道及隨從百人若不興師問罪何以振國
威而申天討迨我師已得庫車兆惠勒兵前進風聲
所過如阿克蘇烏什等城相繼傾心歸化其回部大
頭目霍集斯等復効順前驅惟霍集占奔竄葉爾羌

是以兆惠率師乘機直入洵為有進無退之良將且
我滿洲勁旅所向披靡無敢抗拒即如今夏兆惠富
德等攻城畧地所領僅及千人而左右哈薩克東西
布魯特各處回衆不煩攻勦不待招徠早已爭先納
款其回部一路之阿克蘇等城無不勢如瓦解將謂
乘勝長驅直入葉爾羌喀什噶爾亦屬甚易數年來
平定準噶爾降哈薩克布魯特實為極盛之會而遽
有此大兵被圍之信蓋特因我師晝夜馳驅未免馬

力不足以致一時困守待援所幸先事綢繆朕於六
七月間即次第派遣索倫察哈爾健銳營及陝甘之
綠旗兵前往策應馬匹糧餉亦已籌運在途其時初
不知兆惠今日之奏報也可見

蒼穹垂佑默啟朕衷實深感悚有此部署計現陸續俱抵
葉爾羌矣兆惠與援師合力其氣倍增從此掃穴犁
庭克渠就縛庶幾上申國憲下慰忠魂軍務可告成
事至若身膺間寄奮勇直前計不返顧乃我滿洲大

臣從來敦樸舊俗今兆惠統軍深入志在滅此朝食
自不暇輾轉以為身謀忠誠勇敢朕實深為嘉予兆
惠著由一等武毅伯加二字晉封為武毅謀勇一等
公加賞紅寶石帽頂四團龍補服以彰獎勞賞功之
典具在事之大臣侍衛等俟兆惠回至阿克蘇時查
奏優敘

御製詩紀其事

詩曰我軍取烏什酋長款復獻元戎乘良機率衆直前

進其奈隆冬時枯草經蹂躪以此馬不肥奚堪供斫
陣況臨彼巢穴螳臂孤注奮借一誘我軍萬騎逞驅
趣我師纔千餘鼓勇無退寸橋圯度四百忠義人爭
勸殺賊至千餘矢盡接短刃涉淖退保營相持城下
頓壯士遘七人星馳兩致信舒赫德留守諸回靜以
鎮羽檄催後師繼進期颺迅畢齊阿克蘇赴援雪深
恨夷考兵興來曾無遭挫轍此番客主殊不幸致事
債兆惠稱輕敵請罪誠不吝此非退縮比誰逆料利

鈍終能寡勝衆允由効忠蓋奚忍更加罪褒嘉章服
晉諸臣諸軍士行賞以功論晝夜促後軍直前金鼓
振欲藉士敵愾仰冀

天助順捷音共春來平回鴻績建十二月舒赫德奏言回
人托克托默特自葉爾羌來稱布拉呢敦由喀什
噶爾糾衆五千合霍集占衆圍困大兵三十餘日
忽聞布魯特掠喀什噶爾將軍縱火攻奪賊營二
兩賊酋疑將軍與布魯特有約欲議和將軍執其

使以矢射書傳諭云爾等果欲納款必先入

觀否則不允後賊酋亦射書願送口糧撤圍相見將軍
不報又聞軍營脫出之厄魯特言營中掘得米粟
百六十窖疏入

諭曰兆惠舉動雄偉甚屬可嘉著加恩賞給御用朝珠
金黃帶荷包此帶可常時服用二十四年二月定邊
右副將軍富德奏報臣遵

旨馳援兆惠於正月初六日行至呼爾璜遇賊騎五千

麾衆夾擊轉戰五日四夜會叅贊大臣阿里衮督
解馬亦至分翼謹呼馳突直至初十日黎明斬殺
無筭布拉呢敦脇中鎗傷昇入城旋潛回喀什噶
爾兆惠營中間鎗礮聲知我援兵集厲兵邀擊賊
衆且遣索倫卒及回人四約期夾攻兆惠亦奏言
臣等自上年十月十三日被圍相持三閱月賊引
水灌我營或以葦埽蔽體及掘溝潛伏俱為我兵
擊退狡計百出不得逞帳旁及林木內拾鉛丸數

萬卽用以還擊仰賴

聖主威福

上天神佑靈蹟甚多安營處近戈壁而有深林伐木給用

初憂乏水因賊灌營反獲濟掘井泉輒湧出至正

月初旬井水忽涸又獲藏粟二十餘窖官兵意氣

奮發毫無懼色現於正月十四日與富德合兵還

阿克蘇兩疏入

上覽奏獎慰

御製詩曰圍解萬里遠懷紆午夜頻將軍誠善守

天意本先仁少挫終能勝知難在審因勞哉惟衆士予曰
有良臣更議擣虛策相籌應變神免營終詎脫獲屈
乃求伸重賞斯寧吝明征要必申舞干雖美事何以
謝軍人又

御製黑水行曰喀喇烏蘇者唐言黑水同去年我軍薄
徇穴強弩之末難稱雄築壘黑水待圍解詎人力也
天憚憐明瑞馳驛踰月到面詢其故悚予哀蜂蟻張甄數

無萬三十餘人守從容窖米濟軍軍氣壯奚肯麥麴
山鞠窮引水灌我我預備反資衆飲用益豐銃不中
人中營樹何至折骸薪材充著木銃鐵獲萬億翻以
擊賊賊計窮先是營內所穿井圍將解乃督其中間
言為之悵諸臣實鞠躬既復為之感

天眷信深崇敬讀

皇祖實錄語所載曾聞我

太宗時明四總兵來戰正值大霧彌霄敵施火礮樹皆

燬都統艾塔往視攻回奏敵礮止傷樹我兵曾無傷
矢弓匪今伊昔蒙

帝佑覲揚

前烈勵予冲詎人力也

天帡幪大清寰海欽皇風尋兆惠疏辭封爵及章服

諭勿辭並以其母年老時

遣人存問是時霍集占黨侵和闐

命速發兵援之四月

上以兆惠等籌調兵馬過多

諭速相機進剿並加意搏節糧餉六月大軍分路進布
拉呢敦棄喀什噶爾霍集占棄葉爾羌遁降其衆
四萬餘戶撫定之捷奏至得

旨嘉獎

諭速追擒兩賊酋七月大敗霍集占於阿爾楚爾及伊
西洱庫爾淖爾逆酋兄弟竄巴達克山我軍蹙之
勒令擒獻未幾均被戮十月巴達克山汗素勒坦

沙獻霍集占首安集延霍罕博洛爾諸部相率歸順

諭曰將軍兆惠等勵衆選兵先後追勦屢獲全勝賊勢窮蹙巴達克山諸部共感恩威歸誠恐後今既奉檄自効逆酋授首從此邊陲寧謐各部落永慶安全將軍等凱旋至京時朕當親臨郊勞兆惠已晉公階並迭賜章服其加賞宗室公品級鞍轡以示寵異再著加授一子為三等侍衛十一月奏言回部平定各城

永息干戈而安撫新降仍須駐兵彈壓請於葉爾羌駐一千喀什噶爾駐一千英噶薩爾駐五百阿克蘇烏什等處亦酌派兵駐守並令各城伯克輪班入

覲

允之二十五年二月

命為御前大臣

紫禁城內騎馬先是

上命築壇於良鄉城南行郊勞禮至是兆惠率從征將士凱旋覲謁如儀

上撫勞

賜御用朝珠及馬禮成隨

駕還京

上御豐澤園幄次凱宴

賚銀幣尋

命圖形

紫光閣

御製贊曰濟爾哈朗喀喇烏蘇兩番襲迫均保無虞以知濟險以誠感衆卓哉崇勲闢我提封二十六年七

月奉

旨協辦大學士事務兼管刑部尚書八月

命同大學士劉統勲赴豫勘築楊橋決口尋奏疏濬賈

魯河及開放各事

諭獎其悉中機宜二十七年復同劉統勲等勘江南運

河酌濬高寶諸湖歸江之路

詔如所議行二十八年二月

上以直隸濱水窪地秋霖積潦未消

命兆惠往勘海口廣宣洩並督同御史永安等相度天津靜海文安大城等處疏消事宜三月奏報各工減水日數寸涸出地畝已漸播種皆總督方觀承經理遲悞之咎疏入

敕部察議十月加太子太保十二月奉

旨會同兩江總督尹繼善等籌濬荆山橋河道二十九
年四月順勘直隸河工事竣還京十一月卒

上親臨其第酌酒即以其子扎蘭泰許尚公主為額駙
御製詩悼之曰重坎昔已濟百年今忽消大星落昨夜
密席尚前朝一痛嗟何極千勞憶匪遙恨無執手訣
城闕鎖深宵

諭曰協辦大學士戶部尚書一等武毅謀勇公兆惠質
性精勤材猷明練西陲之役稟承廟略式畀元戎盤

錯屢經膚功懋集是用酬庸錫爵協贊禁廷入直宣
勞正資倚任昨偶嬰微疾遣醫診視方意稍加調攝
即冀就痊遽聞溘逝深為軫悼即親臨奠醊加恩晉
贈太保入祀賢良祠並賞給內帑銀五十兩治喪伊
子尚在年幼並派同族工部侍郎官保及內務府司
官一人代為經理應得卹典該部察例具奏十二月
賜祭葬謚文襄三十年

上南巡至良鄉郊臺

詩曰庚辰曾是勞旋師叩

貺臺陳得勝旗自此西瀛盡來賀每循南路引餘思固資

衆力成勲績實藉元戎善指麾享澤何期騎箕尾不

禁觸境一生悲四十四年

御製懷舊詩列兆惠於五功臣中

詩曰西師歷五年準回兩進討兩討凡兩阻兆惠皆經
了而皆安然出歲功荷

大造設非忠誠篤加以勇略昭焉能合衆志成城錫藩保

耆定贊絲綸章服元勲表謂當永承恩太平佐有道
長予纔三年何不同予老兆惠子扎蘭泰尚和碩和
怡公主授和碩額駙襲一等公爵兼散秩大臣

欽定八旗通志卷一百五十四

欽定四庫全書

欽定八旗通志卷一百五十五

人物志三十五

大臣傳二十一

滿洲正黃旗九 努三 官保
達青阿 愛隆阿 觀音保 扎

拉豐阿 官達色

努三

努三吉林滿洲正黃旗人姓瓜勒佳雍正六年由
前鋒授藍翎侍衛九年授三等侍衛十三年授二

等侍衛乾隆二年

命在

乾清門行走八年授頭等侍衛十年在

御前行走十一年二月赴北路軍營時四川總督慶復

勅下瞻對土酋班滾三月

命努三赴慶復軍營給治裝銀四百兩尋慶復奏班滾

焚斃十二年接任總督張廣泗奏班滾現在如郎

命治慶復罪以努三隨同具奏

命銷去議叙加級革退

御前行走著在

乾清門行走十三年九月

命回京請訓再赴金川軍營十四年授鑲白旗蒙古副都統尋授正藍旗護軍統領十八年四月偕湖廣總督永常赴安西籌議防範事宜十九年正月留駐鄂爾坤軍營二月準噶爾宰桑瑪木特追來降之都爾伯特台吉策凌闌入卡倫

上授努三叅贊大臣偕散秩大臣薩喇勒往會將軍成
衮扎布率兵分路查緝時準噶爾烏梁海宰桑赤
倫居吹地努三偕貝勒青滾襟卜台吉班珠爾分
兵往擒赤倫及所屬四得木齊雅爾都所屬一得
泰家口牲畜至額里音淖爾喀喇烏蘇擒扎哈沁
噶勒襟特兵百五十餘人及為首之達什敦多卜
事

聞下部優叙二十年二月

上以努三及護軍統領烏勒登收服扎哈沁未即擒獲
逃犯巴朗諸事退諉交定北將軍班第定邊左副
將軍阿睦爾撒納審訊並

命叅贊大臣策楞協理北路軍務侍郎兆惠查明努三
等收取牲畜等項有無隱匿一併具奏尋班第等奏
至

諭曰班第等訊問努三烏勒登供詞一切推諉即卸過
於薩喇勒大薩喇勒歸順未久從前收獲烏梁海人

衆時即有搶擄之事以伊舊染準夷習俗初到未知
法度是以姑從寬容若努三烏勒登乃滿洲世僕亦
效準夷之所為是尚可寬宥乎且烏勒登收服烏梁
海時未將逃人巴爾報出努三擒獲包沁逃人特赫
拜哈都理應正法乃並未奏聞請旨俱屬舛謬策楞
所查努三之事尚未奏到著傳諭班第阿睦爾撒納
即將努三烏勒登併案嚴審定擬具奏四月

諭曰據班第等審訊努三烏勒登擬以應斬監候努三

烏勒登收復扎哈沁後並不往拏巴朗實係貽誤軍機罪不可逭但念伊二人去歲收復烏梁海扎哈沁時亦曾隨同効力著加恩免其治罪仍留軍營以閒散効力贖罪努三烏勒登俱係滿洲世僕乃在軍營遠巡畏蒞此次不即正法俾全首領皆朕格外之恩其由軍營查出馬匹什物及伊二人所有家產俱著入官五月授藍翎侍衛在嚮道章京上行走二十一年正月授三等侍衛二月遷頭等侍衛

命同左都御史何國宗往伊犁測量度數並繪地圖詳
見何國宗傳二十二年二月以送兵赴巴里坤至
嘉峪關即奏請回京得

旨降藍翎侍衛仍留巴里坤聽差遣六月招撫巴爾達
穆特各鄂拓克人衆

上嘉其奮勉擢二等侍衛七月授頭等侍衛先是將軍
兆惠追逆賊阿睦爾撒納至哈薩克哈薩克黨逆
拒戰兵敗請降兆惠遣努三與哈薩克來使往諭

即留駐其地尋阿逆竄死俄羅斯

詔努三仍回軍營二十三年正月撤兵至烏隆古聞哈薩克錫喇之得木齊達什扎卜等匿博羅爾托輝努三偕副都統順德訥勒之又生擒盜巴里坤馬之庫魯特宰桑摩羅等於拜塔克收服根敦扎卜達什扎卜丁壯二百餘

上嘉之二月授鑲藍旗護軍統領四月

命經理巴里坤等處屯田七月奏言自穆壘至烏魯木

齊有昌吉羅克倫可耕地十六處令屯兵輪種

詔選內地綠營兵七千往屯八月又奏言兩處應各駐
兵一千五百更番開種

命如數添派十一月偵勦嗎哈沁於博羅托海收其馬
匹疏入

詔賜幣時兆惠被遮黑水二十四年正月努三隨定邊
左副將軍富德往援至呼爾璦分兩翼進擊賊敗
遁努三與副都統鄂博什截賊去路前至兆惠營

告援兵至復脩駝馬迎兆惠營官兵努三鄂博什
為殿回駐阿克蘇事

聞下部議叙

恩給騎都尉世職三月

命赴烏魯木齊經理哈薩克貿易沿途查勘屯田搜捕
嗎哈沁賊衆六月奏言烏魯木齊現屯兵一千再
留凱旋兵五千在特訥格爾昌吉羅克倫一帶分
地墾種明年獲糧即運供伊犁口糧籽種

上是之九月奏擒嗎哈沁訥克衣等下部議叙

命兼管烏魯木齊屯田事是月奏言博克達山在烏魯木齊之東為西陲重鎮請令駐劄大臣每年春秋致祭從之二十五年三月凱旋

上御豐澤園幄次宴賚將軍兆惠富德等及隨征將士賜努三幣十端銀二百五十兩五月兼署正黃旗滿洲副都統八月授右翼前鋒統領二十七年正月授鑲藍旗蒙古都統兼武備院事五月兼上駟院卿

十月

命在阿哥總詣達上行走三十年授領侍衛內大臣三十一年五月管健銳營三十二年十月署正紅旗護軍統領三十三年授

御前大臣三十五年五月

命紫禁城內騎馬三十八年十月調正藍旗滿洲都統四十三年十一月卒

諭曰努三內廷行走多年甚屬出力今聞溘逝深為軫

念著施恩派散秩大臣一員帶領侍衛十人往奠茶酒仍賞銀三百兩辦理喪事應得卹典察例具奏尋賜祭葬如例謚恪靖子依什策楞襲病故襲次已完停

襲

官保

官保滿洲正黃旗人姓吳雅雍正十年由刑部筆帖式擢堂主事十一年遷員外郎乾隆五年遷郎中七年授江南江寧府知府十一年三月總督尹

繼善奏官保不宜外任

詔以京員用七月補刑部員外郎十三年轉郎中十九年改監察御史二十年遷刑科給事中

命巡視臺灣二十二年二月擢漢軍鑲黃旗副都統五月

命往西藏辦事二十六年正月授刑部右侍郎十一月轉左二十七年三月調滿洲正黃旗副都統二十八年以刑部侍郎兼管工部侍郎三十年調工部

侍郎三十一年四月復往西藏辦事先是西藏糧
務通判吳元澄私那藏庫銀買運貨物虧空銀萬
八千餘兩歷任駐藏大臣俱失察官保訪知叅奏
上命官保同駐藏大臣瑪常萃吳元澄職在藏地審明
正法並遵

旨查失察駐藏大臣職名入奏

上嘉官保沿途留心抵藏後即查出此事實屬急公交
部議叙加一級三十二年授正紅旗蒙古都統三

十三年六月署理藩院尚書七月授刑部尚書仍
署理藩院事兼正紅旗蒙古都統尋調正紅旗滿
洲都統十一月兼署禮部尚書十二月充

經筵講官三十四年正月署戶部尚書是月協辦大
學士二月協理步軍統領刑名署理戶部三庫事
務

命紫禁城內騎馬六月

上駐蹕熱河

命留京辦事是月巡察興平倉奏言興平倉新收漕糧
粳米八廩內三廩俱乾潔五廩米色較潮潤若不
豫籌恐霉變虧折查乾隆二十四年江浙漕糧偶
被風潮總漕楊錫紱奏准先行支放今興平倉新
漕米色潮潤之五廩請先支放以免虧缺交倉場
侍郎妥協辦理得

旨俞允嗣經倉場侍郎實麟黃登賢查驗五廩內米色
果灰暗潮潤

上以總漕梁翥鴻不能查察交部嚴加議處實麟黃登
賢率行收倉交部察議尋議翥鴻降三級調用實
麟登賢俱降一級留任九月

命偕禮部尚書王際華戶部侍郎英廉總理平糶事宜
官保以西城麪廠虧短將監糶侍郎蔣元益叅奏
並遵

旨查中東南北四城麪廠情形嗣查奏北城麪麪短少
曾經報出中東南三城監糶大臣未能豫行查辦

請與會同辦理之御史一併察議

諭曰此案短少魑魍緣由北城據實報出所辦尚是該城監糶大臣等免其交部中東南三城未能豫行查辦自應察議但官保等祇知各城監糶之應與處分不知北城早報出伊等不即妥辦以致屢生事端其咎更無可辭官保王際華英庶一併交部察議部議俱降一級留任十一月實授戶部尚書三十五年調刑部尚書兼議政大臣三十六年五月充

國史館正總裁六月兼署兵部尚書三十八年調吏部尚書四十一年正月以患病年逾八旬請將內閣吏部等事務俱行開缺

諭曰官保宣力有年尚能誠謹供職今以老病懇請解任著以原官致仕三月卒遺疏上

敕部查應給恩典照例具奏

賜祭葬謚文勤子萬寧官至布政使凝德任獨石口副將

達青阿

達青阿滿洲正黃旗人姓顏扎乾隆二年由拜唐
阿授藍翎侍衛累遷二等侍衛十三年

命隨大學士傅恒往金川軍營尋

諭曰朕聞大學士傅恒沿途行走部伍整齊兵丁安靜
守法此皆大學士盡心辦理故能妥協如此朕心甚
為欣慰達青阿隨軍脩辦諸務亦能協力黽勉著授
頭等侍衛從此益加奮勉悉聽大學士指示加意勤

慎不可恃恩稍自矜張也十四年二月授鑲藍旗蒙古

副都統十二月

諭曰朕明春幸五臺著達青阿等馳驛前往查勘由太原至固關道路尋授叅贊大臣往北路軍營十七年與喀爾喀副將軍得親扎卜叅贊貝勒額林沁駐防喀錫喇烏蘇十八年五月駐防察罕淖爾特爾奇河源十一月與喀爾喀公格勒克巴木丕勒駐防扎卜堪等處時準噶爾台吉達瓦齊與訥默庫

濟爾噶爾連歲構兵都爾伯特台吉策凌烏巴什
等率所部三千餘戶來降準噶爾宰桑瑪木特以
兵二百追入卡倫達青阿與貝勒策登扎卜公格
勒克巴木丕勒等率兵赴庫克嶺會貝子車木楚
克扎布密策凌等遷移游牧俟果有追兵相機戰
守定邊副將軍成滾扎布以聞

諭曰準噶爾瑪木特以二百人闖入卡倫甚有輕視我
兵之意若不加以懲創將來噶勒藏多爾濟阿睦爾

撒納必愈加恣肆如入無人之境是邊界住劄兵丁
徒有虛名何以保護喀爾喀耶在守卡兵丁僅二三
十名豈能以理曉諭阻止二百之衆成衮扎布達青
阿等即應派兵擒勦何以姑息玩愒至此可將現在
如何辦理之處速行具奏尋成衮扎布奏瑪木特復
逸出卡倫潛回游牧達青阿選兵一千同車木楚
克扎布等相機擒勦十九年正月達青阿遣使誘
致瑪木特於來路設伏瑪木特等至擒之

諭曰從前降旨原令達青阿領兵前往詢問瑪木特闌入卡倫情由應以理責其進卡之罪倘呼之不至或至而心懷不服有所抗拒即以兵力擒拏今但遣一使曉諭而瑪木特即親身前來並無抗拒情形達青阿設計誘擒辦理非是且蒙古人內名瑪木特者甚多並不詢其孰假孰真更極舛錯瑪木特恭順聽命釋放回巢達青阿著來京候旨三月

命在藍翎侍衛上行走効力贖罪二十二年五月擢鑲

藍旗滿洲副都統二十四年三月卒

愛隆阿 弟巴靈阿

愛隆阿滿洲正黃旗人姓覺爾察由前鋒厯遷前鋒侍衛乾隆十七年授正黃旗護軍叅領二十年擢黑龍江左翼齊齊哈爾副都統尋調白都訥副都統二十一年授領隊大臣赴巴里坤軍營二十二年五月偕叅贊大臣富德追擒叛賊巴雅爾至愛登蘇遇哈薩克阿布賚部衆突出與戰數次哈

薩克既歸附

予議叙八月自巴爾楚克至濟爾哈朗接續臺站搜剿賊於沙喇博和什嶺遇都爾伯特納木奇游牧乞降旋遁去愛隆阿追及殺千餘人納木奇遂納款九月收厄魯特宰桑烏魯木游牧百餘戶於察罕烏蘇十月大兵撤回濟爾哈朗

命愛隆阿協辦軍務尋駐守濟爾哈朗巴里坤適中地十二月領兵策應阿里衮追剿沙喇斯等賊二十

三年正月隨靖逆將軍雅爾哈善進討波羅泥都
霍集占先是愛登蘇之戰侍衛奇徹布陣亡至是
愛隆阿呈稱前擒巴雅爾與哈薩克對陣奪回奇
徹布屍富德未奏定邊將軍兆惠奏言臣等查詢
富德從前愛隆阿原報並無奪回奇徹布屍語至
擒獲巴雅爾時其領隊行走之處業已聲明蒙
恩交部議叙愛隆阿顯係爭功請嚴議

諭曰愛隆阿貪功訐告理應從重治罪但伊此次行走

尚為出力加恩免其治罪所有議叙即著停止又

諭曰愛隆阿以羅卜藏多爾濟晉封王爵伊但邀議叙
心懷不足殊不思羅卜藏多爾濟係蒙古台吉愛隆
阿何可相比今但停止議叙已屬加恩前令其在雅
爾哈善隊內行走此次進兵當知立功自贖若不奮
勉効力必將伊從重治罪斷不寬宥六月大兵圍庫
車城賊來援愛隆阿等遇賊於戈壁勦殺甚衆霍
集占親率賊赴救愛隆阿等率吉林及索倫兵追

敗之於鄂根河殺溺死者無算

御製猢猻行有是時實賴愛隆阿率千騎至皆奇男橫
衝截入亂猢猻陣斬將獲醜如囊探之句十月隨將軍
兆惠至葉爾羌城率左翼後隊兵與霍集占賊衆
接戰時靖逆將軍納穆扎爾將至葉爾羌愛隆阿
領兵截喀什噶爾來援路並巡查臺站至托罕塔
罕遇賊勦殺百人十一月授叅贊大臣與定邊右
副將軍富德策應兆惠二十四年正月率右翼兵

敗賊於呼爾瑞及葉爾羌河與兆惠合二月駐烏
什兼防喀什噶爾三月仍在領隊大臣上行走閏
六月兆惠奏言愛隆阿在軍營頗屬効力前議叙
明瑞等遺漏未及得

旨補行議叙尋議給雲騎尉世職八月隨富德追勦霍
集占於伊西洱庫爾淖爾十一月巡查臺站值瑪
呼斯賓巴等賊謀劫察罕烏蘇臺站愛隆阿即領
兵追襲勦獲殆盡事

聞

諭曰愛隆阿一聞瑪呼斯餘孽欲行搶掠即領兵盡勦賊衆此次奮勉更非尋常可比蓋大功既成此等逸賊並未責伊專辦即使逃脫伊亦不至獲咎乃聞信即行俾逆黨不致漏網而臺站得以無虞可謂急公任事大臣官員等果能如此存心何功不就從前賞伊雲騎尉世職著加恩賞給騎都尉二十五年凱旋授正白旗護軍統領兼鑲白旗蒙古副都統二十

六年

命圖形

紫光閣

御製贊曰將門傑種拍張撫髀受將軍檄力戰全歸整
師再進賈勇陷堅弟巴靈阿盡節軀捐二十七年叙
平定準噶爾回部功授一等輕車都尉兼一雲騎
尉世職十一月授伊犁叅贊大臣三十一年卒子
佛爾卿額襲世職官二等侍衛弟巴靈阿由親軍

校洊陞三等侍衛乾隆二十一年遷二等侍衛授
察哈爾總管二十二年二月給坤都爾巴圖魯號
命赴巴里坤軍營尋授領隊大臣八月在博羅齊搜勦
厄魯特賊衆遇伏戰歿

賜卹如例給雲騎尉世職儒臣擬贊曰見賊輒怒如刺
必拔戰博羅齊矢石交戛奮身揮突竟殞賊中既
嚮叛首祭以報忠子永安襲官貴州遊擊

觀音保

觀音保滿洲正黃旗人姓瓜勒佳乾隆十五年授健銳營前鋒藍翎長尋補前鋒校二十一年署前鋒叅領隨征回部十一月從副將軍兆惠勦賊於濟爾哈朗沿途鏖戰甚力二十三年正月以送哈薩克貢馬來京

賞銀三十兩赴叅贊大臣雅爾哈善隊內行走五月雅爾哈善奏兵抵庫車城上鎗石如雨觀音保等負傷攻城殺賊甚多十月從定邊將軍兆惠渡黑水

立營二十四年正月兆惠與副將軍富德合擊賊
觀音保在事有功二月

詔獎軍營奮勉効力之員實授觀音保為前鋒叅領十
月擢正紅旗漢軍副都統二十五年正月調正白
旗蒙古副都統六月

恩賚軍營大員之未預凱宴者

賞緞六端銀二百五十兩二十七年閏五月叙功給騎
都尉世職

詔列五十功臣圖形

紫光閣贊曰濟爾哈朗力固噶蘭喀喇烏蘇襲迫復
完衆謂神兵出兩奇厄論拒守功兵一賊百二十
八年十月派往伊犁尋

命在領隊大臣上行走八月

諭曰伊犁雅爾等處領隊大臣四員尚覺不足著增為
六員伊犁酌派四員觀音保著駐劄伊犁三十年二
月烏什回衆滋事將軍公明瑞遣觀音保率援兵

五百赴勅先叅贊大臣納世通奏派觀音保堵隘
諭曰納世通奏將觀音保所領兵丁撥往隘口堵禦甚
屬非是觀音保所領伊犁官兵既屬可用乃不以之
勅賊而置之閒地豈恐觀音保分伊等之功耶納世
通著嚴行申飭尋納世通奏觀音保進攻因厄魯特
兵先退以致受傷失礮一三月明瑞至烏什賊據
城拒議分兩路擊之納世通等攻城西明瑞偕觀
音保攻城東尋偵賊屯近城山口觀音保創未愈

即率兵四百奮勦明瑞分兩翼應之賊以馬步二千餘犯西路觀音保馳擊賊披靡偕總管達克塔納等奪山隘鎗矢並發賊敗入城殺賊二百餘奏入

諭曰此次進攻方可謂之奮勇勦賊觀音保負傷効力甚屬可嘉賜號卓理克圖巴圖魯六月明瑞奏言納世通辦事錯謬已於軍前正法以觀音保代領其衆八月烏什城內賊三四百人犯西南隅長圍塚

口觀音保率索倫兵力擊退之三十一年補鑲藍
旗護軍統領三十二年四月署雲南楚姚鎮總兵
五月授領隊大臣赴緬甸軍營十一月隨將軍公
明瑞至蠻結分據西山梁巖兵駐守日昃賊由密
林中突出犯觀音保之隊觀音保等擊斬其衆二
百餘十二月明瑞統兵督戰觀音保等領右哨乘
霧深入破賊木寨三十三年二月師至小猛育賊
四面合圍明瑞歿於陣觀音保中鎗陣亡

諭曰觀音保等隨明瑞進勅緬匪勤事捐軀深堪嘉尚
觀音保舊有騎都尉世職著加恩給予世襲二等輕
車都尉尋

賜祭葬如例入祀昭忠祠並附祀旌勇祠予盛明保襲
五十六年因毆斃傭工婦人革職發往伊犁以其
子富增阿襲

扎拉豐阿

扎拉豐阿滿洲正黃旗人姓赫舍里前鋒統領定

壽之孫定壽自有傳扎拉豐阿襲二等輕車都尉
世職乾隆十三年授三等侍衛十五年

命乾清門行走二十年遷二等侍衛二十三年正月隨
副都統濟福赴青海勅沙喇斯瑪呼斯扎拉豐阿
等巡至噶斯不見賊旋回京二十四年擢

御前侍衛赴西路軍營隨勅逆回霍集占等叅贊大臣
阿里衮奏兵至陽阿里克扎拉豐阿等領五百人
捉生抵巴爾楚克擒獲多倫回人搜默特等三十

餘八月

命議敘追勦賊衆之大臣官兵等

賜號西朗阿巴圖魯

賞銀百兩二十五年二月

上御豐澤園幄次

賜將軍叅贊大臣等宴

賞賚有差扎拉豐阿

賞緞十銀百八十兩三月署正黃旗蒙古副都統二十

六年正月補正白旗漢軍副都統九月授叅贊大臣赴烏里雅蘇台是年

命圖形

紫光閣贊曰手格猛虎曾不色變矧驅羣羊窮回敢面昔巴圖魯曰丁將軍孫西朗阿克紹前聞二十七年敘平定準噶爾回部功

賞雲騎尉併原襲世職為一等輕車都尉旋派往科卜多經理屯田六月

諭曰科卜多新開屯田特派扎拉豐阿前往彼處雖將
墾田二十頃之處呈報一次此時地土肥磽雨澤應
時與否及禾苗若何滋長並未奏及伊係叅贊大臣
副都統又專辦軍屯有事自應入告著明白具奏八
月扎拉豐阿奏稱科卜多屯田約計大小麥收在
七分以上惟所種粟因氣寒霜早秀而不實

諭曰都爾伯特人等在烏蘭古木耕種烏梁海人等在
布拉罕察罕托輝耕種俱獲豐收科卜多相距不遠

從前扎哈沁等亦曾開墾收成尚好看來此次或播種稍遲或霜雪早降又或土性不宜種粟著傳諭扎拉豐阿詳詢該處舊日居人酌量辦理十月奏言科卜多屯田用青稞籽種百石向蒙古游牧貿易商民等購買不許運送

諭曰科卜多既有內地商民行走將來生聚必繁今伊犁等處俱建造城堡若照例興工甚屬有益科卜多所有舊城基址既稱地形卑濕著傳諭扎拉豐阿伊

現在安營於科卜多之南哈勒巴山即於該處擇高燥之地計可容兵民若干不必過為寬大派屯田綠旗兵從容興築辦理十一月扎拉豐阿奏言烏梁海內大臣察達克等前往辦理庫克新臣亦領兵五十名往偵探策應

諭曰此次察達克辦理庫克新因庫克新原係伊部落人等逃入俄羅斯又指伊等名目為匪是以自請往辦原不藉扎拉豐阿之助乃伊復請自行領兵前往

徒覺張皇於事無益著速行停止定邊左副將軍成
袞扎布等尋奏額爾齊斯河渡口有兵馬旗幟踪
跡此處向係哈薩克行走之路恐因伊等牧羣被
烏梁海竊取自當加意防範

諭曰察達克等曾請自行辦理庫克新今既有此踪跡
當候信息明確酌量行止昨扎拉豐阿奏請領兵策
應察達克等已諭令不必前往此次非專辦庫克新
可比著扎拉豐阿同察達克等前往於偵探策應之

處自可相資為用二十八年正月察達克擒戮庫克
新扎拉豐阿仍回科卜多六月成衮扎布奏扎拉
豐阿報稱科卜多土肥但蒙古等未諳耕墾若添
派綠旗兵百木石鐵匠數人於現在修補農具將
來建造城房俱有益下軍機大臣議行成衮扎布
又奏扎拉豐阿咨稱科卜多修城請於種地綠旗
兵四百內酌派八十名委員監修兩年可竣於屯
田無悞

允之十一月成衮扎布入

覲

命扎拉豐阿往烏里雅蘇臺署理將軍印務尋來京二
十九年充右翼監督三十年三月署鑲紅旗漢軍
都統四月兼武備院卿三十一年授滿洲正白旗
護軍統領三十二年六月授領隊大臣赴雲南軍
營十一月隨將軍公明瑞至蠻結分據東山梁十
二月明瑞督兵進勦值大霧扎拉豐阿率左哨薄

賊壘奪木寨一勅殺無算三十三年正月給都統
銜二月師至小猛育明瑞歿於陣扎拉豐阿等亦
中鎗陣亡事

聞

諭曰都統扎拉豐阿等隨明瑞進勅緬匪勤事捐軀深
堪嘉尚已降旨兵部從優議卹若僅循例議給世職
殊未副朕逾格酬庸之意扎拉豐阿舊有承襲一等
輕車都尉世職著加恩給予世襲一等男爵尋

賜祭葬如例入祀昭忠祠並附祀旌勇祠謚昭節子春
寧襲世職官正白旗滿洲副都統四十八年緣事

草職

命春寧子富勒洪阿襲四十九年

賞藍翎侍衛隨勦甘肅回匪田五等有功擢二等侍衛
遞遷正藍旗蒙古副都統伊犁領隊大臣

官達色

官達色滿洲正黃旗人姓瓜勒佳乾隆十三年補

健銳營前鋒校二十年征準噶爾派往西路軍營
五月補藍翎長二十一年十一月隨將軍兆惠自
鄂壘扎拉圖至特納格爾勦賊二十二年三月
上南巡兆惠遣官達色及副護軍校兆坦赴

行在備訊問

諭嘉其沿途勦賊奮勉行走授藍翎侍衛二十三年進
勦烏什護送霍集斯之子漠咱吧爾入

覲二十四年正月遷三等侍衛二十六年兼健銳營行

走二十七年五月予雲騎尉世職十一月遷二等
侍衛三十年八月授副叅領三十一年六月遷甘
肅山丹營遊擊三十三年八月

命往雲南以叅將題補三十四年授雲南順雲營叅將
嗣以不識漢文不能辦理綠營事務自請回京當
差經畧大學士傅恒以官達色鑄礮奮勉委署翼
長從征老官屯三十五年副將軍阿桂以官達色
原任叅將已開缺奏補健銳營前鋒叅領三十六

年隨將軍溫福征金川十一月率成都滿洲兵四百抵甲金達時方進攻巴朗拉山梁官達色與侍衛烏什哈達等領瓦寺土兵百餘由山右登奪卡六據其東西碉後高峰十二月復攻巴朗拉官達色與侍衛明仁等攜大礮轟賊碉三晝夜克之

詔給巴爾丹巴圖魯號白金百兩三十七年正月師踰達木巴宗至斯底葉安賊嚴守我兵三路夾擊官達色以礮轟破其碉二月署松潘鎮總兵三月官

兵於北山坡築卡斷賊後賊乘雪夜築二卡攻之
賊棄卡逃越日資哩賊衆亦逃官達色分追賊洄
水淹斃無數餘竄阿哈木雅隨移營至其寨外發
礮轟擊垂破賊夜遁官達色與侍衛賡音素由中
路躡之斃賊十餘人五月溫福等攻南山總兵牛
天畀既克高峰大卡官達色率兵二百協擊有賊
番竄出林中欲截天畀後官達色擊走之遂合天
畀兵下壓斃第二卡拒敵之賊十餘人餘逃入大

卡時天昇連攻南山嶺第二碉官達色領兵攻第三碉以分賊勢多所斬馘三十八年三月署襄陽鎮總兵進攻達爾圖我兵設伏伺賊出擊之賊藏身碉根施鎗礮我兵舉巨礮轟擊日斃數十人時豐昇額議移兵日旁官達色同領隊大臣華善等率兵六千餘駐守宜喜軍營仍每日發礮作進攻狀賊守稍懈五月分路攻達爾圖官達色攻第二碉卡拔其木柵殲賊衆六月賊搶佔木波喇嘛

寺糧站

諭五福同官達色防守丹壩等處三十九年四月

上以凱立葉一路未能深入

命副將軍豐昇額往谷噶會勦官達色與侍衛普濟保
等率兵四千赴谷噶五月定邊將軍阿桂派官達
色隨叅贊大臣海蘭察乘雨雪大作分路攻取喇
穆喇穆高峰大碉奪碉下石卡三殺賊十餘餘傷
竄入大碉至碉根擲火彈以雨濕不燃暫還六月

破色湖普山梁七月復隨海蘭察率兵六百直取喇穆喇穆迤西高峰兩大碉夜半潛發援石壁蟻附而登伏碉旁黎明突破兩碉殲賊無筭旋分三隊攻該布達什諾大碉至溝邊賊覺鎗石如雨我兵益奮躍踰溝剗碉根或緣碉直上賊見勢銳逸出截擊之殲其在碉者附近各卡柵賊俱逃追斬無算時賊尚聚守該布達什諾木城阿桂令海蘭察等統據木城後官兵分道進官達色攻其前賊

守益堅奮勇分攻之克其石卡木城遂突入遜克
爾宗十月攻默格爾山梁官達色與額森特等合
攻其碉卡三冒鎗石攀援直上砍破碉門殺賊二
十餘隨上山攻其西面之密拉噶拉木山奪大寨
一石碉四併克旁近寨落十一月從羅卜克鄂博
攻溝內碉寨官達色等禦格魯克古來援之賊旋
同海蘭察額森特等分隊裹糧踰溝攻格魯克古
了口克當噶海寨及兜烏當噶大碉共焚其沙木

拉渠寨連日攻作固頂沿途碉寨遂與丹壩官兵
合復領兵循格魯克古山梁下壓至桑噶斯瑪特
箐邊有賊卡二躍入殺賊賊潰克山腰石城木柵
四十年正月實授襄陽鎮總兵三月攻達佳布安
吉二寨復分兵三路攻勒吉爾博山趾賊碉官達
色與總兵保寧特成額等分攻第一碉克之四月
攻榮噶爾博下木城及木思工噶克了口碉官達
色截殺來援賊六月攻榮噶爾博第八峰官達色

與普爾普等踰溝拔木寨二十六進逼巴占七月
以巴占抗守甚固分道從舍圖枉卡進攻官達色
循昆色爾山梁東上據雅木則碉對面遂克果克
多山等碉復同泰斐英阿額爾特等焚附近各寨
旋圍拉枯喇嘛寺官兵騰入賊不能遁殲焉遂收
喇嘛科爾所屬之卦爾沙巴等寨焚昆色爾寺及
山陽什爾德察烏曲所屬之格思等寨乘勝克雅
木則戰碉隨同海蘭察等分三路攻章谷大碉賊

掘溝設柵伏鎗石以待我兵拔柵即取其木植駕溝而過緣碉角蟻附至碉頂以次下攻賊驚竄我兵勒殺數十人克其碉並收其旁木城復從章噶下溝分攻各碉卡官達色與保寧仁和等攻克寨落七遂合海蘭察兵攻勒烏圍復同普爾普等由托古魯山半破柵下逼並分攻隆斯得三寨砍寨門先克兩寨殺賊三十餘賊來援潛入最後寨復攻克之寨內貯鉛子積地二尺餘火藥百餘簍收

取之乃設礮臺攻逼勒烏圍之轉經樓旋與保寧
彰霽等克轉經樓官兵合破烏圍賊巢九月同海
蘭察等繞道攻達烏達圍破其當哨克底碉連破
噶拉宇及莫魯古進攻西里賊四出衝抵官達色
踰溝夾攻力殲賊衆賊穿林逃十月與福康安烏
什哈達等各領兵循達思里山麓焚碉寨閏十月
官兵克達噶木攻西里之黃草坪海蘭察攻其前
官達色拔其旁柵遂克之十一月隨海蘭察攻奔布

魯木山峰併策應各路克西里諸要隘拔木柵十餘復同烏什哈達等逼瓦喇占以礮轟破其碉循瓦喇占而下為薩歪有寨落三海蘭察與五福等攻其前官達色與烏什哈達左右合擊賊棄寨逃邀殪之旋隨海蘭察等攻克科布曲木城及索隆古山碉進攻布哈爾朗噶克海蘭察由山坳險徑繞出朗阿古後官達色與烏什哈達軍由左破之收朗阿古官兵並克布哈爾及朗噶克遂據噶爾

占山梁四十一年正月我兵既取舍齊喇嘛寺復
進攻雍中喇嘛寺分兵三路官達色同普爾普等
由右進及暮兵四合賊不能支有喇嘛六十餘出
寺降餘驚潰追勦之進攻噶拉依賊巢二月金川
平三月調山西大同鎮總兵四月賞二等輕車都
尉併所得雲騎尉為一等輕車都尉世職

命圖形

紫光閣列前五十功臣

御製贊曰連環火攻國之雄器率領得人無往不利及至近碉砍門穴孔大呼直入嘉乃獨勇四十三年正

月丁父憂回旗四月

命署直隸宣化鎮總兵四十五年七月卒子哈芬布襲

等輕車都尉

欽定八旗通志卷一百五十五